



Kućni ljubimci

Naida Gadžo

Djeca vole životinje, to je neosporno! Vole razgovarati o životinjama, vole crtati životinje, imitirati ih, čitati priče u kojima su glavni sudionici životinje... Ali, definitivno vole izravni kontakt sa životinjama, igrati se s njima, dodirivati ih! Zato je pravi izazov online nastave iskoristiti dostupne resurse kojih, usput rečeno, ima izuzetno mnogo. Izabrati one prave koji će sadržaj o životinjama učiniti bliskim, zanimljivim, motivirajućim, a za dječije poimanje i senzacionalnim!

Slijedi nekoliko ideja koje mogu pomoći da se ta čarolija i desi!

SNIMITE VIDEO!

Ukoliko imate kućnog ljubimca (psa, mačku, ribicu...) svoje učenike možete upoznati s njim putem video snimka. U video snimku možete obuhvatiti različitu tematiku, koju ćete predstaviti učenicima, što zavisi od vaše ličnosti, ali i uzrasta, interesovanja učenika, te stepena izučavanja sadržaja. Možete iznijeti osnovne informacije o zdravlju, ishrani, higijeni kućnog ljubimca, ali i njegovim potrebama za igrom i ljubavlju. Učenicima će zasigurno biti zanimljivo i ukoliko budete govorili o izgledu vašeg ljubimca, njegovim navikama, a pažnju će im privući i detalj iz života vas i vašeg ljubimca.

Ukoliko nemate kućnog ljubimca, možete zamoliti učenika ili roditelja, koji ima kućnog ljubimca, da snimi video.

Vodite računa o vremenskom trajanju videa: predug video izazvat će zasićenje!

ORGANIZUJTE VIDEO SUSRET!

Možete organizovati javljanje uživo i tada predstaviti svog ljubimca. Tako ćete pružiti mogućnost učenicima da postavljaju pitanja, ali u tom slučaju bi bilo dobro prethodno napraviti najavu, kako bi učenici pripremili pitanja.

PRIPREMITE ZADATAK ZA UČENIKE!


Dobro je da učenici uporedo sa video snimkom dobiju i odgovarajući radni list s pitanjima o kućnim ljubimcima, na koja trebaju odgovoriti na osnovu videa. Prilagodite to uzrastu djece sa kojom radite, ili sa predmetom koji predajete. Ugradite kriterije uspješnosti i pogledajte kako je moguće pratiti napredovanje djece i na ovaj način.

DAJTE UČENICIMA MOGUĆNOST IZBORA!


Učenicima ponudite različite aktivnosti, od kojih će sami izabrati one koje su im zanimljive, poput online slagalica, ukrštenica, te im ostavite mogućnost da svoje odgovore predstave na način koji im odgovara: crtežima, tekstom, ili čak i sami mogu odgovoriti videom, pri čemu mogu predstaviti i svog ljubimca, ako ga imaju ili žele.

DAJTE UČENICIMA DOVOLJNO VREMENA!

Mogućnosti su brojne, vi izaberite!



A EVO KAKO JE TO IZGLEDALO U PRAKSI:



EMAN 01.04.2020.

Fred ima 2 godine, težak je 4 kilograma. Od svoje njuške do repa ima 55 cm. Jako je ponosan na svoj rep koji je dug 25 cm.

Moj mačak se zove Fred.

Omiljena hrana moga mačka je meso.

Moj mačak najviše voli da se igra sa naninim klupkom a kad izade vani najviše voli da se zavlači među granje i plaši ptice.

Mačka je jako čista životinja. Svakog dana uređuje svoje krzno kako bi skinula prljavštinu i nepoželjne mirise.

Svako jutro kad se probudi obilizuje svoj rep i brižno ga njeguje.



